

BONERIANO

EDITOR:
Bonaire Communication Services N.V.

Djaluna 25 Mart 2024

Preis: \$1.25

“
Kuida e
pipitanan di
santu i e seru lo
lubidá su mes!
BONERIANO

TRATO INHUMANO

Mosa di Kultura Boneiru



Djasabra 23 di mart 2024 a tuma lugá elekshon Mosa di Kultura 2024. Tabata un elekshon di dos kategoria kaminda tantu nos reinanan hubenil komo infantil por a demostrá nan talento i alabes nan konosementu riba e simia ku nan a representá. Den kategoria hubenil Raeesha Sint Jago a sali Mosa Hubenil. Den kategoria infantil Zhavia Alexander a sali Mosa Kultura Infantil. Mas detaye den nos edishon di awe.

HAIR BARBERSHOP

Hanchi lenks pabou di Gas Ekspress

Habri 5 dia!
Tel: +599 788-2228 / +5999 529-2228

hair cut

www.hairbarbershop.com

CHANGAN AUTO

HUNTER

/dabboussimotors

xerox

OBERSI ELECTRONICS BONAIRE

\$10 FREE SLOT PLAY

Sign up for your FREE Player's Card and receive \$10 in FREE Slot Play!

Open Monday - Saturday 8pm to 4am | Sunday 7pm to 3am | (599) 717-3504
diviflamingocasino.com | ATM available

DIVI FLAMINGO CASINO

**PA TUR BO
PIESA I TIRE
PA BO AUTO,
BUS OF TRUCK**

NAPA

KAYA CARLOS A. NICOLAAS | 717-6272

LIVE FM 99

Zhavia Alexander i Raeesha Sint Jago

KRALENDIJK - Djasabra 23 di mart 2024 a tuma lugá elekshon Mosa di Kultura 2024. Un aktividad ku a keda organisá pa Della Thode di e grupo di simadan : E simia bon plantá.

Tabata un elekshon di dos kategoria kaminda tantu nos reinanan hubenil komo infantil por a demostrá nan talento i alabes nan

konosementu riba e simia ku nan a representá. Den kategoria hubenil Raeesha Sint Jago a sali Mosa Hubenil i alabes Mosa Popular, Mosa Mihó Show, Mosa Trahe Original, Mosa Trahe Impaktante.

Kei'anna Nieuwkerk a sali Promé finalista Mosa Hubenil i alabes mihó spich kultural.

Den kategoria infantil Zhavia Alexander a sali Mosa Kultura Infantil i alabes Mosa Media Sosial, Mosa Popular, Mosa Spich Kultural, Mosa Mihó Show, Mosa Trahe Original, Mosa Trahe Impaktante. D'haysha Martina a sali Segundo finalista Mosa Infantil i Arianna Mendoza Rodriguez, Promé Finalista Mosa Infantil.

E atardi a kuminsá ku un bunita show di apertura ku a karga e tópiko : E Simia bon plantá den man di Johnrick Anthony i tambe e grupo di baile Mosa di Kultura.

Sigui ku presentashon di spich kultural sigui pa show di talento kaminda kada unu por a amplia riba nan simia i a terminá ku desfile di trahe kultural i tambe kombersashon ku

maestro di seremonia. E bon plantá ta mira bèk riba grupo di simadan e simia un elekshon eksitoso.



Sr. Franklin Daniel Crestian
09.04.1943 - 19.03.2024

Entidat públiko Boneiru ta ekstendé palabranan di kondolensia na famia. Forsa ku e pèrdida.



Na bida:

- Sekretario di estado di Antia Hulandes (1999)
Staatssecretaris van de Nederlandse Antillen (1999)
- Minister Presidènt interino (1988)
Waarnemend Minister President (1988)
- Minister (1987-1988)
Minister (1987 - 1988)
- Gezaghèber interino (1987)
Waarnemend Gezaghebber (1987)
- Diputado (1987)
Gedeputeerde (1987)
- Miembro di Konseho Insular (1987)
Eilandraadslid (1987)
- Diputado na aña 1983
Gedeputeerde in 1983
- Miembro di Konseho Insular na aña 1975
Eilandsraadlid in 1975
- Diputado (1987)
Gedeputeerde (1987)



Mi a lucha e bon lucha, mi a kore e kareda te na fin i mi a mantene mi fe. No a keda mi nada mas awor ku risibi e korona di hustisia ku Señor, e hues hustu, lo duna mi dia e bini bek. No solamente ami, pero tur ku ta warde bini atrobe ku un deseo fervoroso. 2 Timoteo 4:7-8

Na nómber di su kasá:

Rose-Marie Crestian-Pietersz

Yunan:

Daniel 'Dani' Crestian i Medaly Crestian-Coffie
Lysandra Crestian

Nietunan:

Hermine Januska Cesilia, Derek Franklin Crestian,
Claire Nicole William

Rumannan:

*Emiliano Crestian, *Diego Crestian, *Elvia 'Chechi' Molina-Crestian, *Johannes 'Jan' Crestian, Aura 'Sur Magda' Crestian, *Cornelis 'Nechi' Crestian, Julia 'Tutuya' Velez-Crestian, *Edgar 'Eddy' Crestian, Emma Crestian, *Rose-Marie 'Roosje' Vinck-Crestian

Suá- i kuñanan:

Felicio Molina, Jane Crestian, Olga Crestian,
Adeline Fitz-Verploegh-Pietersz, Orlando Pietersz i
Kenneth Vinck

Subrinu- i subrinanan, primu- i primanan, ihánan,
amigu- i amiganan.

Demás famia:


Crestian, Christiaan, Ellis, Mercera, Paula, Finies,
Molina, Anthony, St. Jago, Verhelst, Janga,
Bernabela, Curiel, Sances, St. Jacobo, St. Jacoba,
Vlijt, Pietersz, Fitz-Verploegh, Coffie, Sluijs, Vinck,
Manuela, Johannes, Francisca, Valies, Kanhaai,
Evertsz, Joseph, Balentin i Wijngaarden.

Partido Demokratiko Boneriano, Club Union
Boneriano (C.U.B.) i VESPO

Nos ta partisipá ku a bai sosegá
den brasa di Señor

Franklin Daniel Crestian

*09.04.1943 - † 19.03.2024



Ta risibí bishita di kondolensia promé ku entierro:

Awe djaluna 25 di mart na Consuelo Memorial di 6'or pa 8'or anochi

Entiero ta tuma lugá djarason 27 di Mart kuminsando ku kondolensia na Consuelo Memorial di 9.45am pa 10.45am.

Ta sali Consuelo Memorial pasa Pasangran i sigi pa Misa di Rincon.

Na misa di Rincon ta risibi kondolensia di 1'or pa 3'or sigi pa un santu sakrifisio di misa i entierro final den santana di Rincon.

Un danki spesial na Kas Flamboyan i su boluntarianan pa nan dedikashon i kuido eksepshonal, na dokter Polonia pa su kuido profeshonal i atenshon, na Thuiszorg pa nan kuido tremendo i profeshonal i na Hermine pa su pasenshi, atenshon i dedikashon na Papa.

Nos diskulpa, si den nos tristesa nos por a lubidá di mensioná nómber di algún famia, amigu òf konosí.

Pa info i komunikado den Extra/BONERIANO

Redakshon: extrabon@gmail.com

Aviso mail: avisoobon@gmail.com

Pa aboná riba website di BONERIANO mail na: extrabononline@gmail.com

Ku tristesa pero agradesido pa su aporte balioso,
Fundashon Wegá di Number Bonaire ta anunsia

fayesimentu di

Franklin Daniel Crestian

Na bida fundado di punto di benta di number, Pavo Real N.V.

Fundashon Wegá di Number Bonaire ta ekstendé su mas profundo kondolensia
na famia di Franklin Crestian. Hopi forsa ku e pèrdidá aki.

Franklin, na number di direktiva, maneho i personal, ku bo bon alma sosegá na pas.



TRATO INHUMANO

KRALENDIJK – Tin un situashon inhumano, asta abusu, kontra tripulantenan di e barku venezolano Doña Monica I, ku ta trese fruta i bèrdura for di Venezuela pa merkado lokal. Dos empresario lokal, Onnie Emerenciana i Amado Cicilia, a hala atenshon di BONERIANO riba e situashon aki siman pasá. Nan a bati bèl.

Esensia di e situashon ta e forma kon outoridatnan hulandes, aparentemente huntu ku outoridatnan lokal, ta imponé regla riba e hendenan aki, entre otro ku nan no por pasa anochi

na Boneiru.

No ta promé bia BONERIANO ta pone atenshon riba e situashon aki. Ya nos a publiká un artíkulo den kua ruman muhé di un tripulante a deklará den Korte den Promé Instansia lo siguiente “Loke gobièrnu ta hasi ku hendenan di bark’i fruta ta inhumano.” Den e kaso aki el a referí na e echo ku no ta duna tripulantenan ni un espasio kòrtiku pa bandoná e pir.

BONERIANO a serká Richard Arends, ‘kwartiermaker’ Ekonomia di Entidat Públiko Boneiru (EPB).

E tabata involukra den e proseso pa e barkunan bolbe bin Boneiru. “E reglanan vigente a wòrdu palabrá ku outoridatnan venezolano promé di e habri frontera”, el a reakshoná. Ta parse mas ku un instansia tin di aber ku e situashon aki. Nos a aserká Havenmeester Gunther Flanegin i ta wardando su reakshon.

Trabou duru

Doña Monica ta e úniko barku ku te awor ta trese fruta i bèrdura for di Venezuela pa Boneiru, despues ku a habri frontera pa esaki aña pasá. Na bordo di e barku aki ta bini masomenos 14 tripulante, ku e dia ku e barku sali for di Tucacas mester traha gran parti di dia pa pone e kargashon na bordo, loke no ta fásil. Ta trabou di duru.

Despues ku kaba karga e barku e trahadónan aki ta subi na bordo, krusando laman brutu ku destino Boneiru, na unda e barku normalmente ta yega 6or di mainta, na unda nan mester pura deskargá tur fruta i bèrdura na e waf banda di edifisio di Duana. Un trabou sumamente duru i pisá, den solo kayente, sin niun chèn pa sosegá, pasobra nan mester sòru pa sali bèk pa Venezuela pa mas tardá 6or di atardi, pasobra un òf otro ámtenar na Hulanda a disidí ku nan no por pasa anochi na Boneiru.

Djaweps siman pasá a permití nan keda algu mas

lat, masomenos te 8or, pasobra nan a yega 10’or di mainta e dia ei. Pero normalmente e regla ta estrikto. Yega 6or di mainta i regresá 6or di atardi.

Preshon

Tin algun empresario lokal ta bai tuma fruta i bèrdura na waf mas, pero mayoria, manera e empresarionan chines, ta bai tuma nan karga riba e tereno dilanti Stadion, na un kòntainer ku tambe e venezolanonan aki mester karga riba waf i despues deskargá pa entregá na e empresario nan ku ta tuma nan karga na e sitio ei.

E trahadónan venezolano aki mester traha bou di un preshon enorme di tempu. No tin espasio pa nan por sosegá un ratu pa kome algu. Un situashon inhumano.

Onnie Emerenciana: “E kos aki ta inhumano. Bo no por trata hende dje forma aki. Ta un abusu.”

Amado Cicilia, duanero penshoná i empresario den fruta i bèrdura, ta kompartí e opinion di Onnie Emerenciana i mas empresario boneriano ku konosé situashon ku e hendenan aki ta pasando aden den nan biahe pa trese fruta i bèrdura Boneiru ku e barku Doña Monica I.



Introdusí tratado hèndikèp di Nashonnan uní lihé

KRALENDIJK – E kolegio di derecho humano ta apoyá ku Gabinete adelanto riba e regulashon ta tuma pasonan pa mehora e posishon di habitantenan di Karibe Hulandes ku limitashon. Esaki a sali na kla for di un publikashon riba e website di e kolegio.

Hendenan ku un limitashon na Karibe Hulandes ainda no por partisipá kompletamente na e sosiedat. Nan ta eksperensia hopi opstákulo den nan bida, por ehèmpel momentu di biaha, partisipá na e bida públiko, sigui enseñansa i pa haña i mantené trabou.

Na 2016, Hulanda a ratifiká e tratado di hèndikèp di Nashonnan Uní, pero solamente pa Europa Hulandes. P'esei te ainda e tratado no ta konta pa Karibe Hulandes,

Boneiru, Sint Eustatius i Saba. Ya pa añanan e kolegio ta urgi Gobièrnu pa laga e tratado konta tambe pa e parti akí di Reino. No mester tin diferensia den valides di e tratado den e diferente áreanan di un pais.

Ministerio di Salubridat, Bienestar i Deporte, VWS, tin un ròl importante sí ta trata di e implementashon di e tratado na Karibe Hulandes. Estado Hulandes mester ratifiká e tratado pa e tres islanan tambe. E kolegio ta haña positivo ku Estado Hulandes ta rekonosé e urgensia i ku adelantando riba e ratifikashon ya a kuminsá pa traha un programa di maneho pa e tres islanan, paresido riba e programa di maneho 'Doe onbeperkt' na Hulanda.

Den e cuadro di e



Miembro di kolegio Marjolein Swaanenburg-van Roosmalen.

programa di maneho pa Karibe Hulandes, e sekshon di kuido i hubentut Karibe Hulandes di VWS, dia 3 di novèmber 2023 a organisá un simposio na Boneiru. E simposio akí tabata den señal di konsientisashon i interkambio di konosementu i eksperensia

pa e desaroyonan di e programa di maneho. E kolegio tabata invitá pa durante e kongreso duna un kontribushon tokante e tratado di hèndikèp di Nashonnan Uní i kiko esaki awor i den futuro lo nifiká pa e islanan. Un di e oradónan tabata miembro di e kolegio, Marjoolein Swaanenburg-van Roosmalen.

Despues di e simposio, e kolegio a hasi diferente bishita di trabou na Boneiru. Dor di esaki e kolegio a haña un bon impreshon di e situashon aktual di e derechonan di hendenan ku un limitashon na Boneiru i un promé impreshon di e situashon na Sint Eustatius i Saba. Asina e kolegio ta

prepará su mes pa monitòr introdukshon di e tratado riba e islanan.

E próksimo añanan, e kolegio lo sigui hasi su esfuersonan pa e ratifikashon di e tratado pa Karibe Hulandes i riba informá e hendenan tokante e derechonan di hendenan ku un limitashon, segun e tratado. Banda di esei, desde 2025 e lei igual di tratamentu di hèndikèp i malesanan króniko, tambe lo ta bálido na Karibe Hulandes. Esaki ta nifiká ku habitantenan ku un limitashon di Karibe Hulandes desde e ora ei tambe por entregá un petishon pa un huisio serka e kolegio.

Komishon di Estado Demografia ta bishitá BES

KRALENDIJK – Komishon di Estado di Desarojo Demográfiko 2050, otro siman ta bishitá Boneiru, Sint Eustatius i Saba. Meta di e bishita ta pa haña bista den e impakto di entre otro embeyesimentu i migrashon riba e poblashon.

E delegashon ta konsistí di vise presidente di e komishon di estado, Glenn Thodé i miembro di komishon, Daniel van Vuuren, plùs sekretario Rob de Werd. Anteriormente e presidente, Richard van Zwol, tambe lo a forma parti di e delegashon, pero esaki djárasen a keda apuntá dor di Tweede Kamer komo informadó.

E komishon ta bai hiba kombersashon ku e gobièrnunan insular, ekspertonan gubernamental i komunitario, pero tambe

ku hóbennan tokante e desaroyonan demográfiko den e desena benidero.

Aña pasá a instituí e komishon a base di diferente senario di kresementu, ku e meta pa saka un relato tokante e desaroyonan demográfiko te na 2050 i e konsekuensianan di esaki

pa espasio, ekonomia i fasilidatnan públiko riba e islanan. Na yanüari e komishon a entregá su rapòrt tokante Hulanda.

Sí ta bai elaborá tambe senarionan pa Karibe Hulandes, ta sosodé riba petishon di Tweede Kamer. Ta spera e rapòrt tokante esaki na e zomer akí.



Presidente di komishon van Zwol, ta entregá e rapòrt tokante Hulanda na Minister van Gennip.

Konsulta gubernamental pa mihó finansiamentu di tarea

KRALENDIJK – E konsulta di relashon finansiero gubernamental periódiko, BOFv, mester kondusí na un mihó sinkronisashon riba e realidat di finansiamentu di tareanan eksistente i nobo dor di kua e gobièrnunan lokal di Boneiru, Sint Eustatius i Saba, mester ta responsabel.

“Pa medio di e konsulta

gubernamental akí por traha lihé riba kambionan ku ta di influensia riba e ehekushon di tareanan insular. Esaki ta kontribuí na yega na e destinashon pa futuro di e sistema.”

Sekretario di Estado van Huffelen ta kontestá preguntanan por eskrito di miembro di Tweede Kamer, Raoul White di PvdA.

Popularidat ta relativo
P'esei un propio estilo
No solamente pa ta eksitoso
Sino sigur mas balioso

BròKèS 93.5 FM
pokopoko pero sigur mas i mas hende ta ...
Skuch'è

Telefon/ WhatsApp +599 701 0935
www.radio935bonaire.com

Art Culture Education Foundation preparando pa vários proyekto

KRALENDIJK -- Art Culture Education Foundation, konosí komo ACE Foundation, a kuminsá ku su proyektonan pa 2024. Pa e aña akí ta bai tin tres proyekto grandi i vários proyekto chikí. Asina bosero i kordinadó di proyekto pa ACE Foundation a anunsiá.

Jasir Gressmann a splika ku nan a tuma yanüari i febrüari pa prepará bon e ehkushon di kada proyekto. Luna di febrüari a habri oportunitat pa muchanan i hóbennan for di 4 aña te ku 18 aña inskribí pa e vários proyektonan ku nan ta bai tin.

Muchanan di 4 pa 9

aña ta forma parti di e proyektonan ku ta karga nòmber di ACE Kids Club, muchanan di 10 pa 12 aña ta kai bou di ACE Tweens i e hóbennan di 13 aña bai ariba ta forma parti di e programa di Gang di Arte Boneiru.

ACE Kids Club ta bai karga e tema Boneiru i su Kultura. Bou di e ekipo akí, e muchanan ta bai sera konosí ku Boneiru su folklor, pero tambe nan lo bai sa di e desaroyo di nos kultura. Boneiru e último añanan ta konsediendo un evolushon den su kultura. Hendenan di rònt mundu ta bin forma parti di e kultura Boneriano i ta lagando

nan influensia. Influensia Europeo, Latino, Asiátiko, pero tambe e kultura di islanan den Karibe, ta drentando fuerte den e kultura di Boneiru.

E idea ta ku e muchanan pa medio di arte, ta bai eksplotando Boneiru su kultura di pasado, awor i kon esaki lo bai keda influensia den futuro.

ACE Tweens Club ta bai karga e proyekto ACE-Wood. ACE-Wood ta enserá e mundu artístiko. Hollywood i Broadway, ta kaminda ku artistanan di rònt mundu ta haña oportunitat pa presentá i bira konosí rònt mundu. E trayekto ei ta kuminsá for

di na skol.

ACE Foundation ke bai laga e muchanan sera konosí ku e trayekto ku mester kana pa por yega Hollywood i tambe Broadway. Pa e motibu ei, ke prepará nan bon mentalmente i artístikamente. Ke krea nan propio Hollywood ku ta yama ACE-Wood.

Gang di Arte ta pa hóbennan di 13 aña te ku 18 aña. E hóbennan akí lo bai karga e tema Bonaire 3.0. Den e trayekto akí pa medio di diferente forma di arte, e hóbennan ta bai krea un Boneiru nobo. Nan ta bai hasi investigashonnan i tambe siña bosiferá kiko i kon nan ta mira Boneiru

den futuro. Usando nan talento, nan ta bai krea presentashon futurístiko pa laga komunidad i tambe gobernantenan komprendé nan pensamentu, vishon i deseonan. Aparte di esaki, ACE Foundation ta pendiente pa ehkushon di Siman di Muzik pa Mucha, duna un kontribushon na Siman di Buki pa Mucha i tambe ta preparando pa interkambionan kultural ku Kòrsou, Aruba, Hulanda i Isla Riba.

Kue proyektonan akí, ACE Foundation ta spera di kontribuí na desaroyo kultural artístiko di e muchanan i hóbennan na Boneiru.

Bolsa di karera bon bishitá

KRALENDIJK – Boneiru tabata bon representá na e ‘Nationale

Carrierebeurs’ na Hulanda, na unda ta ofresé puestonan di empleo na Kòrsou i

Boneiru. E interes ta grandi pa e bolsa akí, specialmente pa e empleonan ku ta ofresé.

E delegashon di Boneiru e promé dia a tene un workshòp bou dje nòmber ‘Working in the Caribbean’, na kua okashon consehero di HR (Rekurso Humano) Judith Brekelmans a tene un presentashon.

“Nò bai solisitá ku karson kòrtiku ku slòf na bo pia”, Brekelmans a bisa.

Tatiana Nicolaas a papia di su eksperensia komo empresario na Boneiru. El a konta kon ora ku el a regresá su isla natal kiko a kana bon i kua tabata e kontratempanan. Tambe dikon el a ripará ku realmente e por a duna un kontribushon.



Kunukunan na benta via mákelar

Boneiru ku bandera pero sin tera

KRALENDIJK – Terenonan grandi di kunuku, propiedat, ta na benta na vários parti di Boneiru. Doño i heredero di kunukunan propiedat mas i mas ta hinka benta di nan propiedatnan den man di mákelar, loke atrabes di añanan lo bai hasi Boneiru un isla ku himno i bandera (tera di solo), pero sin tera. Un situashon lamentabel kisas, pero no por hasi nada.

Desde añanan sesenta pa awor hende a kuminsá bandoná kunuku. Boneiru a kuminsá desaroyá i kunukeronan a bira di edat. Nan yunan no tabatin

interes pa sigui ku kunuku, ku komo konsekuensia ku kunukunan a bira mondi, kompletamente bandoná.

E último añanan sinembargo, spesialmente despues di 2010 ku e isla aki a bira parti di Hulanda, hulandes oropeonan a kuminsá haña hopi interes den tereno di kunuku. Por mira pa algun aña kaba, por ehèmpel pariba di Nikiboko i Antriol, kon hopi hulandes oropeo ta biba na kunuku, despues ku nan a kumpra terenonan grandi serka hende lokal.

Un rekorido den áreanan di kunuku ta mustra basta

bòrchi di kompanianan mákelar ku ta indiká ku kunukunan grandi ku ta na benta. Asta un kunuku manera Pink Ranch, un lugá na unda tabata entre otro tene fiesta grandi ántes.

Pero Pink Ranch no ta e úniko kunuku grandi na benta den e área di Dospos. Tin mas, tambe den área di Lasana, na unda mas i mas heredero di e doñonan anterior ta yega na entendementu pa bende kunuku riba kua nan grandinan a drama sodó di nan frenta.

Rònt Boneiru por topa ku e fenómeno aki. Ta

opvio ku esnan interesá pa kumpra no ta boneriano, pasobra bonerianonan por lo general no ta interesa pa invertí den kompra di e terenonan grandi aki.

“Boneiru ta bira un isla ku himno i bandera, pero

sin tera”, un persona a komentá na BONERIANO. Ta algu kontra kua no por hasi nada. Ta prerogativo di e doño pa bende su kunuku, pero e ta duele i lamentabel sí.



Programanan di Bonaire.tv

TELBO kanal 70

Flamingo TV kanal 23

Djaluna 25 Mart 2024

12.00 Aktualidat:	Suzy Thodé
13.00 Aki Boneiru:	Win Martines i Daisy Coffie
14.00 Herensia:	Max Erwin Juan de Grijsje
15.00 BAPA:	Isaac Romualdo Coffi - Eusebio (Cheba) Soliano
16.00 Herensia:	Juliana i Chaira Borderslee
17.00 Aki Boneiru:	Rob Strauss i Jisry Hoff
18.00 Herensia:	Sonia Garmers
19.30 Puerto Latino:	Luis Zárraga
20.00 Herensia Aruba:	Loyd Kelvin Jean Baptist
21.00 Aki Boneiru:	Dilon Rannou
22.00 Herensia:	Minguelina Arcangel (Linchi) Martinus
23.00 BAPA:	David Mooman & Marina Melis

Tur mèrdia 12'or ta kuminsá un programashon nobo di 4 ora.

E programashon aki ta ripití pa 24:00.



TA BUSKA

dos koki pa kuminda Indian

-mester tin minumum 5 aña di eksperensia den restaurant/kushina di Indian Continental Food.

Pa mas inf. por manda bo solisitut na tandoorpalacebonaire@gmail.com
No via selular por favor.

REFLEKSHON HESUS TA STIMA BO

Skritura: Filipensenan 2:6-11

ma a bandoná Su mes gloria, tumando forma di un sirbidó, siendo trahá den e semehansa di hende. I hañando Su mes den kondishon di hende, El a umiyá Su mes dor di bira obedesido te na morto, asta morto na un krus.

Filipensenan 2:7-8(BS)

Si, asina mes. Hesus ta stima bo. Bo ta kana ku e pensamentu ku niun hende no ta stima bo? Bo ta sinti bo so, bandoná i rechasá? Awèl awe mi ta duna bo Bon Nobo. Hesus ta stima bo di bèrdat!

Un karakterístika masha importante i profundo di stimashon ta: bandoná nos mes pa por sirbi e otro. Wow, esaki ta algu ku ningun persona no ke tende den e era moderno di 'self love' akí.

Ma Hesus a hasi esaki pa amor pa ami i pa abo. Hesus ta Dios mes, Rei di reinan i Señor di señonan. Soberano i doño di tur kreashon. Bibando den gloria i splendor.

Pa Amor pa bo i pa ami, Hesus a skohe pa bandoná Su mes gloria, humiá su mes, bira hende, i bai muri na e krus i resusitá despues di 3 dia, pa abo i pa ami por risibí pordon di piká, bida eterno i bira yu di Dios. Ku Su morto El a paga e preis pa nos haña bida.

Ki amor mas grandi. Den Kristu Hesus bo ta stimá, balorá i aseptá.

Risibí e Amor di Dios, risibí Señor Hesus den bo kurason awe. I lo bo eksperensia e stimashon di mas kompleto den bo kurason. Pa medio di Hesus, Dios ta drama Su amor den nos kurason.


E 'Siman Santu' akí, ta un bon momento pa aseptá Dios Su amor i sinti bo realmente stimá!

Miralda Paula-Frans

Produksion PGM

Atkisishon importante pa Reef Renewal Foundation

KRALENDIJK Bonaire i ta un gran --Desde komienso di atkisishon pa e tim den 2024, Lindsey ta huntu ku buseo i trabou di kampo, Reef Renewal Foundation proyektonan kreativo i



eventonan.

Esaki ta loke Lindsey tin di bisa di loke a tres'é Boneiru: "Despues di traha vários temporada di zomer pa servisio di Parke Nashonal na Merka, mi por a biaha den mi tempu liber den wenter na lugánan manera sùitwèst Asia, Belize, Honduras i Australia. Mi a haña mi berdadero pashon pa buseo i konservashon marino na Indonesia."

Despues di a kompleto un evento similar di restorashon di koral ku Coral Restoration Foundation, Lendsey a sa ku e ke sigui traha riba e tereno di restorashon di koral. E ta hopi kontentu di ta un interno di Reef Renewal Bonaire i di amplia su konosementu tokante restorashon di koral. Reef Renewal Bonaire ta gradisí Lindsey di ta parti di e ekipo.

Charla impakto di katibu riba kondishon di salú

Pa Bob Harms tabata un honor di por a presentá un charla riba e tema 'Impakto di sklabilitut riba kondishon di salú di desendientenan di katibu', pa empleadonan di Ministerio di Salú, Bienestar i Deporte, VWS, di Hulanda. Un privilegio tambe di por a tene e charla huntu ku e eminensia riba tereno di sikiatria, spesialmente trouma intergenerashonal, Dòkter Glen Helberg.



Kuidou ku buriku riba kaya anochi

Burikunan ta moviendo hopi riba kaya últimamente. E tin di aber ku sekura, nan ta move tur kaminda buskando awa i kuminda. Nan no por pensa. Ta instinto nan tin. Hendenan tin sintí, pues mester kore defensivo riba kaya pa no dal den buriku. Kuidou ku e burikunan aki.



Aksidente mainta tempran



Tabatin un aksidente di tráfiko mainta tempran na krusada Kaya Industria - Bulevar Julio A. Abraham. Algu promé ku 8or di mainta e aksidente a tuma lugá. No tin indikashon ku tabatin herido.

Trabounan avansando rápido na Sociedad



Trabounan pa konstruí un edifisio nobo di Sociedad San Antonio de Padua na Rincon ta kanando rápido. E foto aki ta muestra kon leu e trabounan tabata djasabra mèrdia.

Workshop tokante sèn falsu

Den kuadro di Global Money Week, a toka turno na Maduro & Curiel's Bank komo un di e partnernan, pa duna un workshop i e biá aki tabata na MBO. MCB tabatin e tópiko sèn falsu. MCB kier a gradisí Terramar Museum pa e oportunidad.



BON BAÑÁ

Edukashon di hende ta un arte. Un arte kual kada dia di nobo bo ta purba ku un tiki di material diferente pa bo krea e loke bo ta spera komo resultado final. Tin biaha bo ta kere ku bo a logra, pero na momento ku bo evaluá e produkto final. Tòg e no ta loke bo kier pa e tabata. Si ta un pintura, bo por bolbe benta e fèrf abou i trata na koregí loke bo a pinta. Pero tin material ku bo no por hasi esei kuné. I un dje materialnan aki yama yu. Tin hopi mayor ta kere ku yu ta un opheto un material pa broma kuné. Si e yu tin bunita kara i tur hende ta hañ'é algu fasinante pa mira, algu agradabel pa wowo. Mas nan ta broma ku nan pida karni harmá na otro. Tin mayor ta kere ku nan yu ta un pintura di arkitektura. Si... nan ta mira nan yu manera un kas, ku kada aña nan ta fèrf kambia su koló. Algu ku no mester lanta den un esfera di kontinuidat. Pa nan komo mayor no ta importante siña e yu norma i balor. Tampoko ta lanta e yu den un esfera di empatia. Tin mayor ku no ta konsiente ku nan yunan mester tin respèt i disciplina. Pa nan mes promé. Pa nan esei nan no ta relevante. Nan yunan mester ta mòndu! Mas arogante mas mihó. Mas kosnan material, pa nan konta mei mei di nan amiganan. Mas material e yu tin, mas mihó hende e yu ta lanta mañan ... segun nan. Tin mayor no tin kunés ku nan yu ta lanta den un ambiente saludabel. Ku saludabel mi no ta referí na kuminda ku tin tur e ingredientenan nutritivo pa e desaroyá efikasmente. Pa nan e yu mester kome, i no ta importá nan ku e yu kome Kentucky, Pan di trùk, Pizza tur dia òf kaka. Ta kome e yu mester kome kla ta! Tin mayor no ta siña nan yunan ni pa drecha nan kama ora nan lanta for di dje mainta. Nan no ta siña nan saludá ora nan ta pasa riba hende. Nada di e kosnan aki ta importante mas. Nos yunan ta lanta den un mundu sibernetiko. Ku nan 'headphone' riba nan oreá ya nan no mester duna kontakto di wowo ku niun hende mes! Katan a bai bishitá Sonia su amiga. Sonia ta un hende ku stima su kachónan. Su kachónan ta su pretu di wowo. E por kai sinta den wowo di hende pa su kachónan. Si bo mira kon Sonia ta lanta su kachónan. Bo ta keda asombrá dikon kachó mes ta skucha i obedesé i hende ku tin sentido di rasonamentu no por. Sonia ta habri su porta di kurá e kachónan no ta sali bai pafó. Sonia ta yama nan na nan nòmber 1 biaha, e kachó ta legumai tur kos kore bin skuch'é. Sonia ta parti kuminda pa nan. Nan ta para dilanti nan baki warda te na e momentu ku Sonia bisa nan kome. E ora ei numa nan ta hinka nan boka den e tayó. Niun ta bai komé den baki di kuminda di otro. Ni ta bebe for di baki awa di otro. Kada unu tin nan kama pa drumi aden. I loke mi ta gusta mes mes, ta ora Sonia bisa nan: Ken e bini serka boso? Nan ta pèrta pia sali bai for di sala. Anto ora di bai drumi anochi ta henter un letania. Nunka mi tabata sa ku kachó mester skeiru djente promé ku nan bai drumi. Einan si mi mester a hari dia m'a wak esei pa promé biaha na kas di Sonia. Anto hende su snùit mes ta hole kaka! Tur djasabra e ta baña nan un pa un. Anto bo mester mira kon nan ta kana drecha baño. Bon mucha para tuma nan baño bai pupu pafó kaba bini paden bin drumi frega nan kurpa riba nan sèrbètè. M'á bai serka Sonia haña Sonia ta zundra sofoká su alma. Su yu a bini kas ku un yu di un amiga. Ku a pidié pa wak un mucha p'e un ratu. Un chabalitu di 8 aña. E mucha a bula kai sinta den su stulnan hisa pia ta buska moda di pone nan na laira. E a bisa e mucha aki ta sinta ku chanchan riba stul, i pianan abou na suela. E no a kaba di bisa e yu esei, ku e mucha a pasa man kue su remote kontròl den man ta kambia e kanalnan den su kara sintá einan.



KATAN DOBLA SIN KIBRA!

Karesidamente e a pidi e mucha ku si e ta asina bon di pone su remote kontròl abou bèk. E mucha a poné abou lanta bai sinta tras di un kòmputer ku e tin den sala. Pasa su dede peg'e, sin pidié. Atrobe e a bolbe konte te tres i a bisa e mucha ku aki no ta mishi ku nada sin pidi promé. Kual e mucha a drai bis'é: Na mi kas mi mama a bisa mi tur kos ku tin den kas ta di mi tambe. E por mishi ku nan pega nan. Até ta splika e mucha atrobe ku su kas no ta akinan pero un poko mas patras den e bario. Ora di kome a yega, na mesa e mucha a splik'é ku na su kas e ta kome loke e bisa su mama e kier kome. I e tin gana di kome Kentucky aworakí. Sonia a bolbe guli manda abou, i a splika e yu aki, ku na su kas su yunan ta kome loke tin den wea. Ata e mucha ta splika Sonia, ku su tata a bis'é ku su tata ta paga alimentashon, pe por kome loke e kier. I si e haña gana di kome Kentucky di djaluna bai kontra djaluna, e sèn ku su tata ta duna ta sufisiente pe kome Kentucky tur dia mes!

Ora e mucha mester a bai kas atardi, e mucha a bai baña su kurpa. E mucha a kue un shampu baña kuné. E shampu ta hole dushi, awèl e a bash'é riba su kurpa. Logá ta shampu dje kachónan e a baña su kurpa kuné. E mucha a sali for di baño ta hole perfume di kachó. Tur loke e a haña poné den e rèki e a kue mishi kuné. Anto sin pidi, òf puntra promé ku e por uz'é. Loke a laga Sonia rabia mas tantu. Ta ku e mucha a basha mas ku mitar dje bòter di shampu di kachó riba su kurpa. E a laba su kabei sigur un tres biaha, paso e shampu tabata skuma bon. Manera e a splika Sonia despues. Ora a puntra Sonia ku e bisa su yu kiko e yu di su amiga hasi ku su produktonan di kachó. Sonia di ... di fadá ku e tabata dje mucha su komportashon, e no a bisa e yu ni mama dje yu nada. Úniko kos ku e bisa e yu ta: Wak pa e mucha no bini aki nan mas! Dia bo tin bo kas, bo bai bo kas kuné di bishita. Ora e mucha tabata bai, maske kuantu Sonia su yu a bisé baha for di outo bai yama ayó. E no kier a baha. E di, solo ta kima, i ya e ta sintá den outo kaba!

Otro biaha e ta baha yama ayó. Awèl Sonia a primí e remote kontròl manda su porta di kurá bai será. Kana yega na porta di outo di su yu i bisé: "Dushi, baha boso tur dos for di mi outo, mi no a lanta bo asina, i mi no kier pa mañan mi nietunan bin hasi ku mi asina. Laga esaki ta un lès pa bo, pa bo sa kon bo ta lanta mi nietunan mañan. Kuminsá kana wak ki ora yònkuman aki ta yega su kas, hende ku no por yamá mi ayó na drechi, ta gradesido pa mi kuminda ku mi a dun'é, i e awa ku mi a fasilit'é pa laba su atras kuné, no ta balorá mi gesto. I ta asta ninga pa yama mi ayó na drechi, no por ta sintá den mi outo tampoko te pa mi fasilitá nan yega kas.

Sonia.....aplouso pa bo.

Ami Katan tambe lo a hasi mesun kos!

PÁGINA SOCIAL

Simadan di Pastó dia promé di aprel

KRALENDIJK -- Djaluna Dos Dia di Pasku di Resurekshon dia promé di aprel 2024 Parokia San Luis Beltran ta selebrá e kustumber Simadan di Pastó. E dia ta kuminsá ku un Santa Eukaristia pa 9or di mainta. Despues di misa ta kuminsá bende kuminda i diferente kos di kome i bebe.

E simadan ta sali 5or di atardi for di Fèlt'i Pariba i ta pasa den kayanan di Rincon. Despues di yegada di simadan na misa e selebrashon ta sigui ku

presentashon di diferente grupo musikal. Lo tin diferente stènt.

Pastor Marc i pastor Fraai ta invitá pueblo di Boneiru pa bin selebrá huntu ku parokia di Rincon Simadan di Pastó 2024, kuminsando for di mainta ku Santa Eukaristia gradisiendo Dios pa tur kosecha risibí riba tur áreanan di bida, kosecha di kunuku, trabou, familiar i spiritual. I den oranan di atardi kue anochi por bin wapa simadan riba ritmo di nos agrupashonnan musikal. Pader Marc i pastor Fraai ta konbidá

tur grupo di folklor pa bin engrandesé e simandan den kayanan di Rincon. Gruponan di folklor por tuma kontakto ku Lendon Leito ku ta kordiná e marcha di simadan.

Simadan di Pastó tin komo meta pa rekoudá fondo pa mantenshon di e edifisio di parokia di Rincon i tur ku kier koperá por hasi esaki. Por tuma kontakto ku sra. Dorothy Cicilia, sra. Ada Albertus i sr. Lendon Leito. E aña aki simadan di Pastó ta dediká na sra. Julia Pourier i sra. Shunilla Kroon.

Èxtra ketu bai fuerte riba merkado

E korantnan Èxtra i BONERIANO – tata ku yu – ta fuerte riba merkado boneriano. No opstante ku tin hopi hende ta aboná BONERIANO digital, e korant di papel ta bon lesá, meskos ku Èxtra. Aki por mira e konosido Rudy, álias Sopa, lesando su Extra djasabra mainta na Rincon.



Kilin ta bende pinda i kala

KRALENDIJK - Durante aktividadnan deportivo e pinda herebé no ta por keda 'fo. Kilin ta kana ku ánimo i bende dushi pinda i kala. Ántes esaki tabata tradishon di Maní Pinda ku ya no tei mas riba e mundu.

Riba e potrèt por mira Kilin ofresiendo su produktonan.



Kachó di mondi ketu bai un problema

Kachó di mondi ketu bai ta keda un problema pa kriadó di kabritu. Un kunukero a kompartí ku BONERIANO potrètnan aki ku ta papia pa nan mes. Den e kaso aki mesora el a eliminá e kachó ku a mata su bestia chikí.



Zorg en Jeugd Caribisch Nederland
Ministerie van Volksgezondheid,
Welzijn en Sport

KAMBIA DÒKTER DI KAS?

Skohe por!

Bon kuido ta nifiká hasi eskoho korekto. Tambe ora ta trata di bo dòkter di kas! Na Kuido i Hubentut (ZJCN) bo por kambia di dòkter di kas entrante promé di aprel.

Kiko bo mester hasi?

Informá serka e dòkter di kas nobo si e tin espasio pa bo komo pashènt nobo.

Despues yena e kambio riba e formulario di kambio na ofisina di kuido situá na Kaya Grandi 91. Òf 'download' e formulario riba www.zvkc.nl.

Entregá e formulario **promé** ku promé di aprel na ZJCN.

Konfiabel, hustu i aksesibel, esei nos ta sigurá bo!

Polis di Bario di Nikiboko ku rekorido den bario

KRALENDIJK -- besindario. Pa e motibu akí Entrante 1 di febrüari 2024, Laurienne Francis ta e polis di bario di Nikiboko i nobo.

Komoparti di e kampaña, a manda komunikado na prensa i a tene entrevista na televishon. Tambe a bishitá diferente skol, akohida pa mucha, instituto, negoshi i tienda, kaminda a parti foyeto di informashon, pega poster i saka potrèt.

Na algun okashon a interkambiá tambe ku habitantenan. Remarkabel ta desafionan ku habitantenan ta enfrentá i a trese dilanti na e polis di bario. Esaki ku e meta pa por yuda tuma akshon kaminda i na momentu ku ta nesario.

Entre otro iluminashon den sierto áreanan, ladronisia, mal estado di kaya, molèster di kachó, molèster di awa na momentu di yobida, molèster di zonido i fever prosedente di motosaikel i outo, outo i trùknan ku ta kore ku velosidat haltu den áreanan habitá i molèster di trùknan ku ta transportá karga, ta kai bou di desafionan akí.

Bunita tambe tabata reakshonnan di habitantenan, entre otro ku awor nan ta sinti nan mas seif ku presensia di Polis di Bario i tambe ku nan sa kon i na ki momentu pa tuma kontakto.

Ku Polis di Bario, Kuerpo Polisial Karibe Hulandes kier duna e

habitante di e bario e sintimentu di siguridat i trankilidat pa biba.

E polis di bario ke ta mas serka di e habitante, ke yuda pensa kuné i ke ta atento pa kualke situashon ku por surgi.

Habitantenan di Nikiboko i besindario por tuma kontakto ku Laurienne na momentu ku mester di solushonnan struktural pa problemanan ku ta keda

bini frekuentemente dilanti den e bario. Mas presensia di polis den bario ta aportá na un mihó komunidad i un mihó isla.

Pa drenta den kontakto ku Polis di Bario, yama 715-8000 durante oranan di ofisina i puntra pa Polis di Bario. Den kaso di emergensia, semper yama 911. Un bon relashon ku Polis di Bario, ta kondusí na un bario seif.



PÁGINA SOCIAL

Eksitoso di 2 Edishon Kidsfest na Van den Tweel

KRALENDIJK -- nan mayor tabata presente Eksitoso di 2 Edishon Kidsfest 2024 na Van den Tweel djasabra 23 di mart. Kantidat di mucha huntu ku

nan mayor tabata presente riba e dia pa gosa di tur e aktividatnan ku tabatin pa hasi, anto grátis. Aña pasá Van den Tweel

Supermarket a organisá e evento pa promé biaha i e tabata un éksito. E aña aki no tabata un eksepshon. Muchanan por a gosa di Kids Corner, suikerspin, popcorn, bouncers i saka nan potrèt na e sitio i risibí esaki.

Di e manera aki Van den Tweel Supermarket a duna bèk na e pueblo di Boneiru, spesialmente e muchanan. Un aktividat ku kos pa hasi i algu pa kome i bebe pòrnada pa e muchanan.

Sigur por a mira kantidat di mucha kontentu, pero tambe e mayornan ku un sonrisa riba nan kara. Sigur un bon idea pa duna bèk na komunidad, loke diferente hende a komentá na e sitio.



Desendiente di Julio (Shòròmbu) Herrera

Gilberto Herrera ke haña mas klaridat di su rais

KRALENDIJK – Gilberto Herrera, nietu di e legendario komersiante Julio (Shòròmbu) Herrera, tabata siman pasá na Boneiru pa sera konosí ku e isla kaminda su tata, Guillermo, a nase. Gilberto, kende tin mésun nòmber ku ruman di su welo, a bini Boneiru pa haña mas klaridat tokante su rais familiar. Su áktuprima Ellen Herrera, tabata su anfitrión. E ta biba na Cali, Colombia, na unda e ta un konosido siruhano.

Gilberto no tabatin masha noshon di Boneiru. E sa sí ku su tata Guillermo a nase na Boneiru, pero e no tabatin niun kontakto ku su famianan riba e isla aki, ku ta famianan Herrera i Van der Ree. Su tata no tabata papia masha tokante Boneiru i su famianan. Ademas, dia ku su tata a fayesé den segundo mitar di añanan setenta, Gilberto apénas tabatin 7 aña di edat. Pero e ta kòrda ainda morto i entiero di su tata.

“Mi ta e úniko yu di mi tata i mi mama. Mi mama tabatin mas yu promé ku el a kasa ku mi tata. Semper m’a keda ku gana di sa mas di e bida di mi tata na Boneiru, di su famianan, pero nunca anterior mi tabatin e oportunidat aki”, Gilberto Herrera a bisa.

Búskeda

Na sierto momentu Gilberto Herrera a kuminsá ku búskeda di mas informashon tokante famia Herrera di Boneiru. Loke a yud’é hopi ta e wèpsait www.archivoboneiru.com, tambe artíkulonon skirbí pa Bòi Antoin ku ta disponibel riba Internèt. Asina, pokopoko, el a bin lesa di su welo Julio Herrera i su ruman Gilberto Herrera, ku huntu tabata sosio den e kompania Herrera Hermanos.

El a tuma kontakto ku Bòi Antoin. Tambe el a operá un pashènt boneriano na Colombia i a puntra informashon tokante e isla

aki i su famia. Mas despues el a bini den kontakto ku Ellen Herrera, nietu di Gilberto Herrera. Pues nan ta áktuprimu di otro.

Siman pasá Gilberto Herrera tabata na Boneiru den kompania di su esposa Karen, kende ta mésun fasiná ku su esposo pa historia di famia Herrera di Boneiru, su grandinan.

Ellen a hinka un programa interesante pa nan den otro. Un parti importante tabata un bishita na ofisina di FuHiKuBo (Fundashon Histórikiko Kultural Boneriano) pa papia ku Bòi Antoin, kende a yega di skirbi hopi di famia Herrera.

Pregunta

Gilberto ta sintá ku basta pregunta relashoná ku historia bida di su tata. Pakiko el a bandoná Boneiru i despues resultá na Colombia, pais ku el a drenta despues di a permanesé na Venezuela. Via Cucutá el a drenta Colombia.

“Pakiko mi tata a bandoná Boneiru i no tabata papia masha di su rais boneriano? Ken a sòru p’e despues ku su tata a muri na 1931? Asina mi tin mas pregunta”, Gilberto ta puntrando su mes.

Loke Gilberto por a komprondé sí ta ku su tata a regresá Boneiru meimei di añanan setenta. Asta el a kuminsá un shòp chikitu na unda e tabata drecha radio ku televisor, riba kua e tabata eksperto. Pues tékniko di radio i televisor. No masha tempu despues ku el a regresá Colombia el a bin fayesé, lagando su yu hòmbler Gilberto komo mucha di 7 aña atras.

Archivo

Durante su bishita na Boneiru Gilberto siman pasá el a dediká algun ora na FuHiKuBo, tantu djaweps komo djabièrnè. Entre otro



el a kumbersá djabièrnè ku René Roders, kende aña pasá a publiká un biografia di Lodewijk D. Gerharts, basá riba informashon ku el a saka for di e archivo enorme di Gerharts, ku entrante otro luna lo ta wardá na FuHiKuBo.

Roders mas ku niun hende aktual konosé e relashon entre L.D. Gerharts i famia Herrera/Van der Ree. El a kasa ku Julia (Duchi), yu muhé di Julio Herrera. Den su archivo tin hopi informashon tokante e empresa Herrera

Hermanos, ku a stòp di eksistí na momentu ku e dos ruman hòmbler nan Julio i despues Gilberto Herrera a fayesé na respetivamente na 1931 i 1933.

Por mensioná ademas ku Guillermo, tata di Gilberto, tabata un pionero den e parti di Colombia na unda el a biba despues te na su morto riba tereno di radiodifushon i televishon.

Djabièrnè Bòi Antoin a graba un programa Herensia ku Gilberto Herrera i Ellen Herrera.

The most complete payroll and HR software in the Caribbean!

Payroll Pro
HRM

Download the mobile app!

www.payrollprohrm.com

Available on the Google Play and App Store.

E 'imperio' di Herrera Hermanos

KRALENDIJK – E bishita siman pasá na Boneiru di Gilberto Herrera, yu di Guillermo Herrera, na su turno yu di Julio Herrera, ta tira lus riba un empresa hopi importante na Boneiru masoméno 100 aña pasá, Herrera Hermanos. Den mésun tempu ei tabatin un otro empresa grandi, Hermanos Craane, ku despues a bende su propiedatnan ku Jozef Hart Sons. Tambe tabatin e komersiante Jules Hellmund, doño di entre otro e plantashinan Guatemala i Yato Bako.

Herrera Hermanos tabata kompania di e ruman hòmbènan Julio Herrera i Gilberto Herrera, yu di un komersiante ku a bini for di Santo Domingo. Jose Altagracia Rosa Herrera.

E tabatin e kunuku Roi di Lamunchi na kosta pariba di Boneiru.

Herrera Hermanos a kombertí su mes den un empresa grandi ku diferente propiedat, manera plantashi, barku, tienda i asta un sierto momentu tambe eksplotadó di salu den e saliñanan na parti sùit di Boneiru. Washington (America), anteriormente parti di Slagbaai, a bira na 1920 di Herrera Hermanos.

Van der Ree

Desendentenan di Gilberto Herrera no ta asina kompliká pa komprondé kompará ku esnan di Julio Herrera. Motibu ta ku e parti mas grandi di e yunan di Julio no a karga fam di nan tata, ku pues ta Herrera. Nan tabata Van der Ree,



fam di nan mama Marianne (Shon Annie) van der Ree. Julio no tabatin yu ku su mes esposa.

Julio Eustaquio Rosa Herrera ofisialmente tabata kasá ku Maria Cornelia de Jongh. Pero e no tabatin yu ku su señora, sí ku Shon Annie van der Ree, ku ken e tabatin pues un relashon pafó di matrimonio. Julio a kasa na 1893 ku Cornelia.

Dia 21 di mei 1924 Cornelia a fayesé. Julio djis despues a kasa ku Shon Annie van der Ree i a haña Guillermo, ku sí a haña e fam Herrera di su tata. El a nase den matrimonio. Pero e otro yunan di Julio, ku nan tabata yama Shòròmbu, ku Shon Annie van der Ree a keda van der Ree. Nunka Julio Herrera no a rekonosé nan. Dia 4 di aprel 1926 Shon Annie a muri, dos aña despues di Cornelia.

Un dje yunan ei, Julio Cesar (Boy) van der Ree, a usa no ofisialmente e fam di su tata, pues Herrera (Julio Cesar van der Ree zich noemende Julio Cesar Herrera). El a lanta tambe un negoshi di bibida komo J.C. Herrera. Pero e kaya ku su nòmber (ofisial) ta Van der Ree.

Otro yunan di Julio Herrera i Shon Annie van der Ree tabata Julia (Duchi) i Irma. Duchi a kasa ku LD Gerharts.

Kiebro

Na aña 1931 Julio R.E. Herrera a muri, loke a kondusí tambe na terminashon di e relashon di sosio ku tabata eksistí entre e dos rumannan Herrera. Dos aña despues

Gilberto (Gijsberto), alias Shon Geispu, tambe a fayesé. E herederonan di Julio Herrera a atkirí henter e plantashi Washington di Herrera Hermanos.

Na aña 1940 e yu mayó di Julio Herrera, a bira doño absoluto di e plantashi aki. Tabata trata di Julio Cesar (Boy) van der Ree, ku tabata enbolbí kaba ku e plantashi for di aña 1936. E tabata supervisor di e plantashi for di e tempu ei.


Birando doño di e plantashi aki, Boy van der Ree por a implementá e mihorashonnan ku e tabata mira nesario i ku e tabatin den mente pa hopi aña kaba. E mester a oumentá e produkshon di e plantashi na un manera òf otro di loke e tabata te na e momentu ei.

Na aña 1967 Bòi van der Ree a bira malu. Promé ku el a muri el a tuma e prekoushonnan pa e tereno no kai den man di spekuladónan. El a duna opshon na Gobièrnu di Boneiru pa kumpra e plantashi, loke a sosodé tambe.

Boy van der Ree ta derá den Washington, awendia un parke di naturalesa bou di maneho di STINAPA.

Freddy van der Ree, yu di Boy, a bisa den un entrevista: “Mi ta kere ku el a hasi e kos aki debí na temor ku lo por a bini pleitu den seno di su herederonan, den sentido ku nan lo por bai pensa na bende e plantashi. I esei tabata algu ku e no tabata ke pa pasa. E no tabata ke pa e lugá aki a bai kai por ehèmpel de man di estranheronan, ku peliger ku nan por a bai usa e plantashi aki pa traha proyektonan grandi, dañando e naturalesa. El a hasi e trámitenan pa despues di su morto Washington keda den su estado original.”

Dia 16 di novèmber 1967 Boy Herrera a fayesé. Algu mas ku un aña despues e aktanan pasa dilanti notario pa e plantashi a bini de man di gobièrnu, pa despues keda kombertí den un parke di naturalesa.





DEN PASO DI BÒI

Nos a drenta 'Siman Santu'. Un siman kòrtiku pa korant. BONERIANO no ta sali djabièrnè, djasabra ni djaluna otro siman. Djadumingu di mes korant no ta sali. Pues kuater dia sigui sin korant. Pero awor BONERIANO tin su página di facebook aktivo, di manera ku boso no ta pèrdè nada. Tur loke pasa ta bini mesora riba nos página di facebook. Nos kantidat di siguidó ta subiendo stabil.

Hopi tenshon den mundu. E guera entre Rusia i Ukraina, situashon na Yemen, menasa di China, konflikto entre Nort i Sùit Korea, atake di Israel riba Palestina. Atento ku a kosta bida di alrededor 140 den un teater na Moskú. Asina por sigui menshoná. Ya ta kuminsá papia riba un posibel Guera Mundial. Ami tambe ta mir'é biniendo. Promé Guera Mundial tabata di 1914 pa 1918 i Se-

gundo Guera Mundial di 1940 pa 1945. Un Terser Guera Mundial lo ta devastador pa poblashon mundial.

Mi no sa rabia fásil. Pero djaweps ei sí mi a sali fo'i mi kueru un ratu na momentu ku mi a mira kon tripulantenan di e barku ku ta trese fruta i bèrdura for di Venezuela tabata traha den solo kayente. E personanan aki (14) mester a pura deskargá tur kos den un par di ora, pasobra outoridat no ta pèmití pa nan pasa anochi na Boneiru. E barku mester sali pa mas tardá 6or di atardi rumbo bèk pa Venezuela. Den un artíkulo den e edishon awe di BONERIANO por lesa mas di e asuntu aki.

Laga mi pone e kos aki riba un rei pa boso komprondé. Djárason e hendenan aki a traha kasi henter dia pa karga e barku na man, na e for-

ma primitivo, na Venezuela. Barku ta sali anochi for di Tucacas, nabegá henter anochi, pa yega Boneiru djaweps pa 10or di mainta. Normal e ta yega 6or. Mesora deskargá e barku, loke ta tuma basta ora. Despues tumba bèk pa Venezuela. Niun momentu di sosiegu.

Dos boneriano riba waf, Onnie Emerenciana i Amado Cicilia, a sali na defensa di e venezolanonan aki, dunando deklarashon na mi tokante e asuntu aki. Dos boneriano ku kurashi ku ta kai na pena di e venezolanonan aki. Reglanan ku Hulanda ta imponé riba nan. No gobièrnu lokal. Bo no por trata hende dje forma aki.

Pakiko no laga nan sosegá trankil i sali e siguiente dia? Lo ta mas humano.

E dianan aki mi ta pasando den dokumen-

to-nan digital ku mi a publiká atraves di masomenos 45 aña den korant. Artíkulonnan tokante historia, kultura i naturalesa. Mi mes a spanta mirando di kuantu artíkulo ta trata. Ta artíkulonnan ku nunca a sali publiká den buki. Niki Pietersz, kende konosé e archivo di FuHiKuBo mihó ku ningun otro huntu ku

mi, ta kompilando tur e artíkulonnan aki. Mi ta prent nan i warda. Tambe mi ta warda e vershon digital pa futuro. Mi no tin masha energia mas pa saka nan na buki. Mi ta purba plama nan sí riba e página di facebook di BONERIANO.

Tira bista si boso tin tempu.





Djasabra ei, despues di basta tempu, mi taba atrobe di bishita na Saliña di Tam, e biá aki huntu ku un grupo di trahadó di Cargill. Un asina yamá 'team building'. Atrobe e bunitesa di e sitio aki a toka mi. Boneiru ta inmensamente bunita.

MONCHI & TONCHI

Boneiru ta bai den un direkshon straño 'ki.

Awèl sí. Sí sigui asina pronto nos nòmber ta bira Bonrusia



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Hefe di redakshon
Nathaly
Evertsz-Ipcedencia

Redakshon
Papi Antoin
Edson Pietersz
Ibi Piar (deporte)

Partner na Aruba
Awe Mainta
Partner na Kòrsou
Extra
Partner na Boneiru
Live99

Layout
Maya Beaumont

Konsehero:
Bòi Antoin
786-6818

Aviso
avisobon@gmail.com

Djadumingu di Rama den Pashon di nos Señor Hesukristu

Bendishonamentu di Rama

Evangelio : Marko 11, 1-10

Selebrashon di Santu Sakrifisio di Misa

Promé Lektura : Isaias 50, 4-7

Salmo : Salmo 22, 7-8, 16-19, 22-23

Di dos Lektura : Filipensenan 2, 6-11

Evangelio : Marko 14, 1-15, 47

Awe nos ta selebrá Djadumingu di Pashon, mas popular konosí komo Djadumingu di Rama. E ramanan ku a kaba di bendishoná ta símbolo di dos kos ku aparentemente ta kontradiktorio: nan ta nifiká triunfo i martirio. Ku rama nan tabata aklamá e héroenan ku tabata regresá viktórico, i tabata hinka un rama den man di mártirnan ku tabata muri pa nan fe. Rama ta símbolo bunita di henter Siman Santu ku ta enserá e misterio di krus i gloria, di morto i bida.

Nos ta papia di e entrada triunfal di Hesukristu den Herusalèm entre palma i gritu di alabansa, pero sin embargo nos sa, ku tur profeta ku drenta Herusalèm ta drenta pa muri. E dia aki, e promé un di Siman Santu, tin por lo tantu un smak zirzut di triunfo i di morto. Pa algun ora so e multitud di hudiunan ta bira entusiasma ku Hesus i ta zuai rama rondó di e figura mahestuoso i humilde di e Nazareno; kuater dia despues, riba Bièrnè Santu, nan lo sak'é di siudat, kargando un krus, na kaminda pa kalvario.

Ta parse ku ta parti di nos kondishon humano pa meskla harimentu ku lágrima, derota ku triunfo, alegría i doló. Kuantu bia nos ta bisa, komo si fuera konsolando nos mes, ku den e mundu aki ningun hende ta kompletamente felis. Éksito, triunfo, ta palabranan mas deseá den tur lenga. Nos tur ke triunfá por lo ménos un bia den bida. Nos ta buska kon gana den negoshi i kon gana den amor. Riba kada dia nos ta subi kaya en buska di e loke nos ta yama "triunfá". Sin embargo, pa mayoria, triunfo ta un fantasma skur, un soño dorná i mashá leu.

Rumannan, Siman Santu tin wardá pa nos un sekreto fantástiko, ta e sekreto di tri-

unfo, e sekreto di kon transformá derota, doló i morto den viktoria, goso i bida. Ta e sekreto di Hesus.

Si Hesukristu tabata ke ta huntu ku nos, E no por tabata ku lomba pa nos doló. El a karg'é riba djE i subi kaminda kabes na haltu. Aki nos ta reuní dilanti di kargadó di e krus, e úniko boluntario, esun mas generoso: Hesus di Nazareth. Awe, dilanti e krusifikado di ya pa mas di dos mil aña, laga nos meditá riba sentido di doló, respetando su misterio, for di nos eksperensia, for di nos bida konkreto i krusifiká gòlpi pa gòlpi ku tempu manera testigu insensibel.

Tur nos sufrimentunan ta pone nos riba e kaminda di kalvario, pero riba e kaminda ei nos ta peregrino, no di morto, sino di speransa. Kristu ta e lider tras di kende nos speransa i di hinter mundu ta peregriná. Doló no por gana e wega, pasobra egoismo nunca por vense amor, ni tampoko doló tin e último palabra for di momentu ku Kristu a resusitá i for di dia ku E ta reuní ku nos riba kada djadumingu pa duna nos forsa i ehèmpel den eukaristia.

Hesukristu sa ku doló ta e materia prima ku mas ta abundá den mundu, pero na mesun tempu E ta laga nos mira ku den e plan di Dios e otro kara di doló ta Pasku. Pa e rason aki Siman Santu ta e siman mas kargá ku speransa. Nos sa ku nos eksistensia un ta un kareda desesperá t'e na morto, sino mas bien un renasementu kontinuo. Nos fe ta simbolisá den e ramanan aki ku nos ta bai hiba nos kas. Ku e ramanan aki por papia ku nos di e sekreto di Siman Santu, di ku den Kristu ta posibel ku doló ta kambia den alegría, morto den bida.

Hesukristu, presente riba e mesa eukarístiko, ta yama nos



Djadumingu di Rama

Outor: Tere Fernández

Ora El a yega Herusalèm pa selebrá Pasku, Hesus a pidi su disípulonnan pa trese un buriku pe i a subié. Promé di drenta Herusalèm, e hendenan a buta nan mantel riba kaminda i otronan tabata kòrta rama di palunan trahando un forma di tapeit, tal manera nan ta kustumbrá na saludá reinan.

Esnan ku tabata bai dilanti i patras di Hesus tabata grita: "Bendishoná ta esun ku ta bini den nòmber di Señor! Hosanna den altura!"

El a drenta e siudat di Herusalèm, ku tabata e siudat mas importante i kapital di su nashon, i hopi hende, mucha i hende grandi, lo a kompañ'é i a risibié komo un rei ku palma i ramanan gritando "Hosanna" ku ta nifiká "Biba". E hendenan di siudat tabata puntra, Ken esaki ta i nan a kontestá: "E ta e profeta Hesus, di Nazaret di Galilea". Esaki tabata su entrada triunfal.

E multitud ku tabata siguié tabata forma dor di hende hònber, hende muhé i mucha, kada un ku su nòmber, su okupashon, su kosnan bon i malu i ku e mesun interes di sigui Hesus. Algun di e personanan aki tabata presente den e milageranan di Hesus i a skucha su parabelnan. Esaki a hiba nan pa alab'é ku ramanan den man ora El a drenta Herusalèm.

Hopi tabata esnan m ku tabata ke a sigui Kristu den e momento ei di triunfo, pero poko tabata esnan ku lo a kompañ'é den su pashon i morto.

Miéntras esaki a sosodé, e saserdotenan hudiu tabata buska pretekstonan pa ser'é den prizon, pues nan a haña miedu ora nan a mira ku e hendenan tabata stim'é kada biaha mas i kon nan a aklam'é ora El a drenta Herusalèm.

Ki nifikashon esaki tin den nos bida?

Ta un oportunidat pa proklamá Hesus komo e rei i sentro di nos bida. Nos mester parse e hendenan ei di Herusalèm ku a bira entusiasma dor di sigui Kristu. Bisa "biba mi Kristu, biba mi rei..." Ta un dia den kua nos lo por bisa Kristu ku nos tambe ke siguié, maske nos tin ku sufrí o muri p'É. Ku nos ke pa E ta rei di nos bida, di nos famia, di nos patria i di hinter mundu. Nos ke pa E ta nos amigu den tur momento di nos bida.

Splikashon di Misa di Djadumingu di Rama

E Misa ta kuminsá ku e proseshon di ramanan. Nos ta risibí e ramanan i nos ta bisa o

kanta "Bendishoná ta esun ku ta bini den nòmber di Señor". E saserdote ta bendishoná e ramanan i ta dirigí e proseshon. Despues e Misa ta kuminsá. Ta lesa e Evangelio di e Pashon di Kristu.

Ora Misa kaba, nos ta hiba e ramanan na nos hogar. Tin un kustumber di kologá nan tras di porta den forma de krus. Esaki mester rekordá nos ku Hesus ta nos rei i ku semper nos mester dun'é un bonbiní den nos hogar. Ta importante no hasi di esaki kustumber un superstishon pensando ku dor di tin e rama aki, ladron lo no bai drenta den nos hogar i nos ta bai ser libra di mala suerte.

Orashon pa pone e ramanan bendishoná den nos hogar:

Señor bendishoná nos hogar. Ku Bo Yu Hesus i La Birgen Maria ta reina den djE.

Pa bo interseshon duna nos pas, amor i respèt, p'asina ku respetando i stimando nos sa di honr'é den nos bida familiar, Sea Abo, e Rei den nos hogar. Amèn.



STATIA/SABA/ST. MAARTEN

Sientífikonan di klima a bishitá Saba

TH BOTTOM -- Siman pasa e sientífikonan di klima, Iris Keizer i Nadia Bloemendaal, di e instituto Hulandes di Meteorologia, KNMI, a bishita Saba pa kompartí nan konosementu di kambio klimatológiko. E bishita ta relashoná ku e rapòrt di senario di klima ku KNMI a publiká aña pasá na òktober. Pa promé biá e islanan Boneiru, Sint Eustatius i Saba, ta inkluí den e rapòrt akí, ku a pronostiká posibel senarionan di klima futuro pa BES relashoná ku kambio di klima.

Senario klimatológiko

Den su reportahe, KNMI a enfoká riba e implikashonnan di kambionandentemperatura, presipitashon, bientu i nivel di laman pa islanan BES. Nan a analisá tambe kon orkannan lo kambia den futuro. KNMI a desaroyá 4 senario di klima basá riba un futuro ku emishon haltu di dióxido di karbon i un futuro ku emishon abou di dióxido di karbon. Dióxido di karbon ta un di e promotornan prinsipal di kambio di klima. Dentro di e senarionan di emishon haltu i abou, KNMI a distinguí un senario húmedo i seku, mustrandó e resultadonan di ekstremo den desaroyo di presipitashon.

Den e kuater senarionan, e temperatura i e velocidat di

bientu ta oumentá, miéntras ku e presipitashonnan ta baha. Segun e modelonan, e futuro klima di Saba lo ta mas similar na e kondishonnan di El Niño ku ménos presipitashon i mas velocidat di bientu. Esaki ta nifiká ku den futuro ta posibel ku e habitantenan di Saba ta eksperensia temperaturanan mas kalor ku e aparesementu di ola di calor mas intenso, periodonan seku mas largu i bientu mas fuerte en general.

Sinembargo aunke e modelonan ta muestra un tendensia di El Niño, opservashonnan klimatológiko ta muestra ku e klima aktual ta mas similar na e kondishonnan di La Niña, ku ta trese mas awa, pero tambe ta mas favorabel pa desaroyo di orkan.

E informe ta muestra tambe ku orkannan por bira mas fuerte den futuro ora e temperaturanan di laman subi. Modelo di simulashon ta revelá ku orkannan mas severo den futuro lo tin velocidatnan di bientu máksimo mas haltu i intensidatnan di presipitashon máksimo mas haltu, maske no ta kla si orkannan lo sosodé mas frekuentemente. Esaki ta nifiká ku e habitantenan di Saba por eksperensia orkan ku bientu mas fuerte i mas áwaseru.

Orkan tambe por

intensifiká mas lihé den futuro, saltando for di kategoria 1 pa kategoria 4 i mas den un periodo kòrtiku di tempu. Esaki ta kousa pa temperaturanan di oséano mas kalor, ku ta aktua komo un super fuel pa alimentá orkan.

Saba tambe lo eksperensia un oumento di nivel di laman. Miéntras ku esaki por no tin un efekto inmediato riba e isla, ku eksepsion di e haf, e por afektá e islanan rònt di dje i e teritorio kontinental di Merka for di unda Saba ta importá su kuminda i otro suministro.

Aktornan lokal

Parti di e bishita di Keizer i Bloemendaal na Saba, ta tambe pa konosé nan interesadonan den e parti Karibense di Hulanda i komprondé e eksperensianan di personanan ku nan bida, den un forma òf otro, a keda afekto pa fenómeno meteorológiko ekstremo komo resultado di kambio klimatológiko. Nan a topa ku diferente parti interesá miéntras nan tabata riba e isla.

Un di e reunionnan tabata ku vários hefe di departamentu gubernamental, asesornan di pólisha i partidonan interesá den siguridat i órden públiko, konservashon di naturalesa i energia. Komo parti di nan investigashon,

ta importante pa Keizer i Bloemendaal komprondé kon kambio di klima ta impaktá e diferente departamentonan i sektornan gubernamental di e isla. Tambe a tene un enkuentro pa Keizer i Bloemendaal kompartí nan konosementu ku e públiko en general i pa nan tende e eksperensianan di e residentenan ku a keda afekto pa kambio klimatológiko.

Keizer i Bloemendaal a reuní tambe i a presentá nan investigashon di klima na Kolegio Ehekutivo. E meta di e reunion tabata pa informá e desishonnan di e isla tokante loke por spera den futuro. E informashon aki ta fundamental pa disidí kon pa impulsá e desaroyo di Saba ku konsiderashon di kambio di klima.

Preparando pa futuro

Miéntras Saba ta kontribuí poko na kambio klimatológiko na eskala global, e i otro islanan den e region lo sinti mas e impakto di kambio klimatológiko. E gravedat di e impakto di kambio di klima ta determiná pa e nivel di emishon global di dióxido di karbon i sí e nashonnan grandi i industrialisá ta komprometé nan mes ku polítika i akuerdo internashonal, destiná pa redusí emishon. Esaki ta algu ku Saba no tin kontròl riba dje.

Sinembargo, Saba tin kontròl riba kon e por prepará i adaptá na kambio klimatológiko.

Na kuminsamentu di e aña akí, a desaroyá un agènda klimatológiko ku Ministerio di Asuntunan Ekonómiko i Pólisha Klimatológiko, Ministerio di Infrastruktura i Maneho di Awa, Ministerio di Interior i Relashonnan di Reino, huntu ku e gobièrnunan di e 6 islanan Karibe Hulandes. E agènda tin 8 prioridat, inkluyendo oumentá energia renobabel, desaroyo infrastruktura resiliente na klima i planifikashon espasial, mehora maneho di awa i desecho, stimulá ekonomia sirkular, intensifiká protekshon di ekosistema, finansiamentu i insentivo ekonómiko, asosiasionnan di koperashon i interkambio di konosementu i monitòr i evaluashon.

For di e agènda akí, Entidat Públiko lo elaborá un plan klimatológiko ku akshon pa prepará Saba pa futuro. Durante su diskurso na e enkuentro riba kambio klimatológiko, Gezaghebber Jonathan Johnson a deklará: “Den medio di e retonan akí, nos tin e oportunidat di skohe un rumbo pa un futuro mas resiliente i sostenibel.” E meta ta pa kompletá e plan pa fin di e aña akí.



KÒRSOU

Rapòrt eksterno

Ret di elektrisidat Aquaelectra preokupante

WILLEMSTAD -- En bista di e informashon tokante e blackoutnan na Kòrsou i e rekomendashonnan di e rapòrt Laborelec/Engie, ta parse ku Aquaelectra ta enfrontá retonan tékniko i operashonal importante. E echo ku ta rekerí un invershon di 750 mion florin pa mehorá e infrastruktura

di energia i awa i kumpli ku e rekomendashonnan, ta indiká un retraso significativo den mantenshon i modernisashon di e ret. Preokupashonnan identifiká pa Laborelec/Engie, manera e nesidat pa mehorá konfigurashon i filosofia di protekshon, ta indiká debilidadnan fundamental den maneho i monitòr di e ret. E falta di simulashon i anáalisis adekuá promé ku e blackoutnan, ta enfatisá un posibel falta di preparashon i kompromentu di posibel fayò di e ret.

E rekomendashon pa warda e konfigurashon di protekshon den un base di data i verifiké via simulashon, ta un paso krusial pa mehorá

konfiabilidad operashonal. Esaki ta sugirí ku e sistema aktual no ta sufisientemente dokumentá òf probá regularmente, loke ta esensial pa un maneho efektivu di e retnan eléktriko. Ademas, e enfoke riba investigashon di protekshon di turbina di bientu i simulashon di kontròl di generatòrnan disel, ta indiká un konsiensia di e komplikashonnan ku fuentenan di energia renobabel ta trese pa e stabilitat di e ret. Atendé e puntonan spesífiko akí, ta fundamental pa garantisá un transishon stabil na fuentenan di energia mas sostenibel. E nesidat pa investigá kon pa limitá produkshon di unidat di disel den kaso

di problema di stabilitat, en bes di deskonektá nan for di e ret, ta indiká ku e mekanismo aktual di reakshon di Aquaelectra na fayò den e ret, por ta muchu drástiko i por kousa interupshon innesesario. Sinembargo, ta parse ku Aquaelectra tin un kaminda kompliká pa dilanti, no solamente pa atendé ku defisiensianan tékniko inmediato, pero tambe pa implementá un enfoke mas proaktivo i avansá pa atministrashon di e ret. E implementashon eksitoso di e rekomendashonnan di Laborelec/Engie, ta esensial pa mehorá e konfiabilidad di suministro di energia na Kòrsou i prevení futuro blackout.

Korupshon i mal supervishon di haf

Base ideal pa transporte di droga

WILLEMSTAD -- Bandanan internashonal di narkotráfiko ta skohe a haf di Kòrsou mas i mas komo punto di salida pa manda kantidat grandi di kokaina Hulanda i otro destinashonnan Europeo. Esaki ta e konklushon di e revista marítimo Hulandes, De Schuttevaer, basá riba demandanan resien na Willemstad. Resientemente nuebe sospechoso di tráfico di droga a keda huzgá.

Segun e ekipo de koperashon investigativo, RST, e outoridatnan a desmantelá un ret bon organisá di aktividatnan kriminal, ku konsekuensianan importante pa siguridat i integridat di e instalashonnan portuario di e isla.

E sospechosonan a usa personal di e haf korumpí pa pone kokaina den kònteinernan ku tabata

bai Europa. Ta kalkulá ku e balor riba kaya di e droga interseptá na por lo ménos 200 mion florin. Ministerio públiko a eksigí kastigu pisá di entre 5 i 15 aña di prizòn kontra esnan envolví, dependiendo di nan ròl den e operashon.

Un faktor importante ku ta hasi Kòrsou atraktivo pa e aktividatnan kriminal akí, ta e falta di vigilansia marítimo. Pa kasi un aña, Warda Kosta no a stashoná un barku di stashon na e isla, p'esei banda di narkotráfiko ku boto rápido por dediká nan mes na nan asuntunan kasi sin opstákulo.

Polítika Hulandes na Dan Haag, a indiká ku esaki mester kambia pronto. Ta spera ku na aprel òf mei ta manda un otro barku di stashon pa e region pa patruya den Mar Karibe, pa asina stòp e transportenan di droga.

'Curaçao Experience Ambassador Edition' a superá tur espektativa

WILLEMSTAD -- 'Curaçao Experience Ambassador Edition' a reforsá e posishon di Kòrsou riba e mapa mundial, ku mas di 25 pais representá durante e konferensia.

Durante e dianan di 18 te ku 20 di mart, e partisipantenan a traha huntú intensivamente pa eksplorá i eksplotá oportunidatnan pa por

realisá mas koperashon. E embahadornan ta regresá nan pais ku interes pa siguí reforsá e relashon ku gobièrnu di Kòrsou i eksplotá oportunidatnan komersial ku lo benefisiá tur.

Tabata un siman inolvidabel pa tur e partisipantenan. Nan a partisipá na diferente presentashon i a bishitá

diferente instansia i lugánan na Kòrsou. E evento úniko akí a tuma lugá pa promé biá riba na Kòrsou. Esaki ta hasi e evento unu históriko.

Inisiadó, Minister Plenipotensiaro, Carlson Manuel i Minister Presidente, Gilmar Pisas, ta kontentu ku e éksito inmenso di e evento. El a superá ekspektativa.

PENSAMENTU DI SIMAN

Invertí den AWE

Pasobra maske solo ta baha tur dia, esei no ke men ku ta final di e dia.

Kada dia ta gana un pida chikí di eternidat ora ku e wòrdu konektá ku historia.

"Asina anto, siña nos konta nos diano, pa nos por presentá na Bo ku un kurason yen di sabiduria." (Salmo 90:12)

Rumannan.... Esta un bunita pensamentu!
Un siman bendishoná pa bo.

25 mart 2024



ARUBA

Riba e trabounan haci den cuadro di landspakket riba e tereno fiscal na Aruba

Minister Maduro a reuni cu secretario di estado Van Huffelen

ORANJESTAD -- Diaranson Minister Maduro di Finansa hunto cu e profesionalnan di Departamento di Impuesto a reuni cu Secretario di Estado sra. Van Huffelen pa asina duna un bista di e trabounan cu ta wordo haci den cuadro di Landspakket riba e tereno fiscal na Aruba.

Durante e reunion a brinda un presentacion di e cambionan cu a wordo introduci pa por cumpli cu tema C di e Landspakket.

Entre nan, a duna un bista di e implementacion di e Plan di Impuesto 2023 y e resultado te awo di e cambionan fiscal aki cu ta toca tema C1 di e Landspakket. A splica tambe riba e bon noticia cu Aruba ta riba e lista di cooperacion y transparencia fiscal di OECD cu ta toca tema C2 di e Landspakket. Fuera di esaki a indica cu ta trahando awo riba tema C3 y C4 di e Landspakket pa fortifica e administracion y hisa e nivel di cumplimento/

compliance. Por ultimo a indica tambe cu reunionnan ta wordo hiba acabo pa yega na un palabracion fiscal entre Hulanda y Aruba den e prome kwartaal di aña 2024 pa asina por cumpli tambe cu tema C5 di e Landspakket.

E reunion a bay den bon ambiente na unda cu Minister Maduro y e profesionalnan di DIMP a tuma tempo pa asina por a contesta tur pregunta y brinda mas informacion pa asina e Secretario di Estado

Hulandes por ta miho informa di e trabounan riba e tereno fiscal na Aruba.

Minister Maduro ta gradici sra. Van Huffelen pa su bishita y e cooperacion di Hulanda pa yuda na fortifica

DIMP. E mandatario ta gradici tambe e ekipo di DIMP pa e gran trabou cu ta wordo haci pa Aruba por conta cu un sistema fiscal cu ta traha na bienestar di nos Pais.



DEPORTE

Di dos edishon Siman di Deporte habrí

KRALENDIJK -- Djaweps atardi a tuma lugá e apertura oficial di e di 2 anual Bonaire International Sports Week 2024. Pa duna inisio oficial na e seremonia di apertura, esaki a kuminsá ku palabranan di bonbiní di Terrence de Jongh hefe di INDEBON. Promé ku el a papia a tene un minüt di silensio, rekordá un persona ku a hasi hopi pa deporte ku a bai sosegá.

“Awe nos ta pará na di dos edishon di e siman di deporte. Aña pasá masha komentario tabatin rondó di e aktividat. E aña aki tambe tin 10 rango di deporte. Ta partisipá Aruba, Kòrsou i otronan. Nos tur ta huntu awe pa nos sostené otro pa e evento grandi aki. Sin gobièrnu di Boneiru, TCB, Fundashon Wegá di Number Boneiru, E

kompetensia di deporte aki no por tabata un realidat. Ta trata di un evento hopi grandi. E partnernan nan a uni pa organisá esaki. Mayan e weganan ta kuminsá i tin diferente wega. Futsal, beach tènis, beach vòli, sòftbòl otro siman ta bai tin kompetensia di landamentu ku ta hopi popular, e swimming pool natural. Asina mas.”

Diputado Clark Abraham

“Mi ta kere Terrence a bisa mayoria kos. Den deporte ta e manera mihó pa nos hóbennan uni i konektá ku otro. Ta bunita pa nos kompetí i organisá deporte i nos ta huntu. Danki sigur na Terrence pa loke e ta hasi. Mi ta haña bunita pa mira pa tiki ku INDEBON tin kon nan ta desaroyá.



Ayera un ekipo di Boneiru a empatá ku El Salvador. Usa e momentu aki pa e talento i e bunitesa di nos isla. Di e manera aki nos ta invitá tur otronan, pa bin disfrutá di nos dushi Boneiru. Danki na boso tur pa loke boso ta hasi pa logra e ‘sport week’ aki posibel. Ban sigui ku e

desaroyonan aki i krea mas pa futuro.”

Anne Marie Mercera direktor Fundashon Wegá di Number Boneiru (FWNB).

“Deporte ta loke FWNB ta inbertí den deporte, e mihó manera pa hende move, ta hasiendo deporte. E deportenan ku ta bai tin hendenan ta bai kompetí i tambe ta bai tin klínika. Mayornan ku tin mucha ku no ta hasi deporte ainda, pasa wak e enkuentronan i inskribí e yu pa un di e deportenan. Ánimo ta grandi espektativanan ta grandi i nos ta trahando huntu ku otronan pa hasi e rangonan di deporte mas grandi huntu ku boso.”

Representante di TCB Marjolein Oleana.

“Nos ta orguyoso pa tuma parti na e siman di deporte ku ta bai tuma lugá. Hopi deportista lokal a pone Boneiru riba mapa. Nos por mensioná Taty i Tonki entre otro ku a destaká den e deporte di windsurf. Danki pa tur esnan ku a kontribuí. Sigui destaká den rango nan di deporte, no solamente lokal, pero tambe internashonal. Hopi éksito pa un i tur e rangonan di deporte ku ta bini.”

Despues a tuma lugá kòrtamentu di sinta, deklará e di 2 anual Bonaire International Sports Week 2024 habrí.





Rijkdienst Caribisch Nederland

**Vakatura
Gezaghebber pa
Entidat Públiko Boneiru**

E funshon di Gezaghebber pa Entidat Públiko Boneiru ta vakante. A habri e vakatura di nobo riba 4 di mart 2024. Si bo ta deseá di bini na remarke pa e funshon aki, bo ta kordialmente invitá pa ekspresá esaki por eskrito promé ku 7 di aprel 2024. Por haña mas informashon tokante e vakatura i e teksto di anunsio riba:
www.rijksdienstcn.com/vakatura





tandprothetische praktijk
BONAIRE
tandprothetische praktijk



AKI TA TRAHA I DRECHA PLANCHA PA DJIENTE. BO TA WARDA MIENTRAS NAN TA DRECHE, SERVISIO RAPIDO.

djaluna pa djaweps: 9'or mainta pa 12'or merdia, 2'or te 4'or di atardi.

djabierna: 9'or mainta pa 12'or merdia, atardi ta SERA.

E.M. Rijswijk
Por yama pa un sita na tel. 717-2248 òf selular 796-3714
Kaya Dr. J.G. Hernandez s/n (banda di Botica Korona)

Minister a topa ku studiantenan di MBO Boneiru

KRALENDIJK -- Resientemente Minister di Enseñansa, Siensia, Kultura i Deporte, Sithree van Heydoorn, a topa ku

un total di 21 studiante di MBO di Komunitat di Skol Boneiru, SGB, na Kòrsou. E alumnonan di e skol MBO tabata na Kòrsou ku e meta pa presentá nan proyekto. Nan ta den e último aña di estudio den e área di kuido i bienestar, deporte i rekreashon.

Bou di guia di nan dosentenan nan tin un proyekto, 'Nelly Clarinda adoptá un hende grandi'. E meta di e proyekto ta pa e alumnonan pasa por lo ménos 1 ora pa luna ku un persona mayor.

Durante di e bishita nan ta kombersá, entretené i

dialogá ku e persona.

E studiantenan ta keda guiá pa un tim di lider di e skol mes ku ta Dietrich Winklar, Suzy Bergland-

Balentin, Guilluama Coffie, Tom Verbeek, i Eric Koeks.

Minister a keda sumamente kontentu ku e bishita i a indiká di bai traha

ku un skol sekundario aki na Kòrsou riba e proyekto similar ku esaki i huntu ku e skol sekundario MBO Boneiru.




15.6" HP Laptop
AMD Processor
8 GB RAM
Windows 11

\$439
SPECIAL PRICE


hp OFFICIAL STORE

Gift Backpack Included





Smart shopping ▶ Better living

Get HP Original Products,
we are their Official Store on Bonaire.






Wireless Router
\$56



10.2" Apple iPad
\$409

Smartphones & Smartwatches
with warranty & support

STARTING AT
\$245